



Ez Êzdî me, ez ne Kurdim!



Cankurd

„ Bersiva min ji pirsêkê re“

26.12.2006

Dema ez zarok bûm, Gelek caran Ereban ji min pirs dikirin: **„Inte Muslêm, em Kurdî?“** [*Ma Tu musilmanî an Kurdî?*].. Min paş bihnekê, bi tirs û fedî digot: **„Ez Kurdim û ez musilman im.“** Lê wan ji me nedipejirandin, her digotin: **„La...Inte Muslim û bes.“** [*Na...Tu tenê musilmanî.*]

Hebûna **Ezdahî** „**Êzdî**“ an „**Yezîdî**“, wek olek serbixwe di herêma rojhilata navîn de, êdî rastiyeke e û wek rastiyeke hatiye pejirandin, û nema tê bincilkirin, lê belê **Ezdayî** wek neteweyekê bê bingeheke e û kesek nikane wek rastiyeke bi cih bike, ji ber ku mezintirîn latê ku neteweyek li ser ava dibe, ziman e. Zimanê hemî Ezdiyan **„Kurdî“** ye, lata dî ya ku netew li ser ava dibe: Nişte e „*weten* e“. Nişte serekîn û dayikî yê Ezdiyan Kurdistan e. **Êzdîstan**, an jî **Êzdaniya** ji aliyê çî dûroknas û warnasan ve nehatiye lêvkin. Rast e ku **Êzdî** niho li Iran, Irak, Sûriye û Tûrkiyê belav bûne, û ji wan jî hinde yekgirdeyên „*mutteh'edên*“ wan li Sovyêtistana berê, Ewrûpa û hinek welatên dî belavin, lê bêguman ewan di kok û binyad û nijadê xwe de Kurd in û ji Kurdistanê hilbûne, an hatîne koçkirin û tev ji aliyê dayikê an bav de, an hem bav û hem dayika wan Kurd in. Erebe, Turk, Fars û Ermenî, ku Kurd di orta wan de dijîn, nebûne Êzdî. Tenê Kurdên Êzdî hene, wek yê musilman, fileh û ciho. wek hêja kek **Masûd Barzanî**, serakê Kurdistanê, îro di parlemana herêma Kurdistanê Iraqê de gotiye: **„Êzdî Kurdên resen in.“**

Belgeyên dûrokî bi cih dikin, ku **Kurd** wek „**Netewe**“ ji zû ve hebûne, lê hîç belgeyek wilo nîne, li teviya çîhanê, ku dibêje: Neteweyek **Êzdî** bi zimanekî xwe, an bi cî û warê xwe, cihê ji ziman û nişte Kurdan, hebû.

Hinek zanayên Êzdî di va dema dawî de bizava xwe dikin, ku ola **Ezdahî** wek bermayek olî ya **Zerdeştîyê** diyar bikin. Ewana dibêjin ku ola Kurdistanê ya berî Islamê **Zerdeştî** bûye. Dibe ku eve bo para rojhilatî ji Kurdistanê, û bo hinek herêmên başûrê Kurdistanê rast be, lê bo piraniya para mayî ji Kurdistanê ne gotinek bi cihkirî ye û bê binyad e. Gava em dûroka **Elwaqîdî** li ser Islamkirina Sûriye, navend û bakur û rojavayê Kurdistanê bixwînin, emê bibînin ku giş şehzade û qeralên bajar û bajarokan hîngê li teviya herêma ku dikeve navbera **Behdînan** û **Mûşê** de fileh bûn, ne zerdeştî bûn. Ji aliyekî dî ve rêç û şopên filetiyê di teviya herêmê de, wek di dêr û keleşan de li ber çavan in, hema yek nîşanek li ser zerdeştbûna herêmê di wan deman de nîne.

Gelek stranên me yên bi **Kurmancî**, bi taybet yên herêma **Tor Abdin**, li ser têtikiya Kurdan û filetiyê pir dibêjin, lê li ser Zerdeştîyê tiştekî nabêjin. Ji xwe peyva „**Zerdeşt**“ an „**Zerdeştî**“ tew di pirtûkên olî yên **Ezdahîyê** de nehatine. Ne di „**Qere Furqanê**“ [*Mishefa Reş*] û ne jî di **Cîlwe** de (*Binêre: kurd.net, para Erebi*). Têkilî di navbera herdu olan de nehatiye lêvkirinê. Lê gava yek bibêje: „**Erê nehatiye zimên ji ber ku Êzdahî Zerdeştî bi xwe ye**“, emê bibêjinê: Vane pirtûkên herdu olan bide berhev ka ev rast e an ne. **Zerdeştî** ta bi **Hindistanê** belav bûye û ji gelek gelan mirovên Zerdeştî hene, lê **Êzdahî** tenê di nav gelê Kurd de belav bûye. Dibe ew ji Zerdeştîyê kevintir be, lê belê rêç û şopên vê olê li nav gelên dî tune ne, an min nedîtine. Di herdu pirtûkên **Êzdiyan** de li ser şahên **Girîkî, Asûrî** (**Herdu netewe ta bi niha jî fileh in**) û li ser yên **Farsî** tê peyivîn, û cara yekê ye, li gor nasîna min, di olekê de navê pêxemberek jin „**Xasiye**“ tê lêvkirin, lê navê **Zerdeşt**, ku bi sedan sal ji **Şêx Adî** kevintir e, naye zimên. Olên ku tê de dayik di ser bav re bû, kevintir ji yên dî tên dîtin.

Tenê di pêşekiya pirtûka [**Nivêjên Êzdiyan**] de, ku ji aliyê çapxaneyaya **Ettereqî** ve li bajêrê **Helebê** (*Sûriye*), ku bi bîzava kovara **Hawarê** hatiye çapkirin, hatiye nivisandin, ku **Kurd** hemî berî filetiyê **Zerdeştî** bûne (*Binêre malpera kurdax.net, para kurdî*). Lê eve bi cih nayîne, ku berî **Islamê** Kurd tev li ser ola **Zerdeşt** mane, an rast tev **Zerdeştî** bûn. Navê **Xasiyê** ta bi niha jî li hinde herêmên Kurdistanê heye û Kurd, tenê Kurd, wî navî li keç û dotên xwe dikin. **Şêx Adî** û şêxên dî giş tên lêvkirin, hema **Zerdeşt** na. Ez vê dibêjim, ku diyar bikim; **Êzdahî** berhemek gelek kevnare ya civata kurdî ye, ne ya neteweyek biyanî ye.

Di pirtûkên **Êzdahîyê** de gelek navên bi Erebi wek **Şêx U'dey Bin Musafirê Hekarî, Şêx Ebû Bekir, Hecî Mihemed, Şêx Mûsa, Şêx Hesên** û ... ên dî hene, lê ev ne nîşana **Erebbûna Êzdiyan** e...

Di qewlê [**Xweşmalê Baba**] de wilo hatiye:

Şêx Adî ji Şamê hilbû
E'dewiya „Êzdiya“ miraz hasil bû
Mekanê Sultan Şêx Adî ji dil bû

Di qewlê [**Silavê Cebîre**] de, wilo tê gotin:

Sibeyeke jêt E'dewî ye
Da bideyn medh'ê Şêxê U'deyî ye

Heca me Zemzem e û muxar e û Kaniya Sipî ye

Di [Firwara pêxember Mihemed] de:

**Rojekê ji rojan e
Nebî dibêje mêran e
E'îlî û û Eba Bekir û U'sman e
Ro li min ya giran e**

Li dawiya vî qewlî, weha tê gotin:

**Nebî digot: E'yşe
Ciyekî bo min dane ser dera pêş e
Iro giyanê min gelekî bi êş e**

**We dibêjît E'yşe dota Ebû Bekir
Dilê min mabû bi xem û xeyal û fikir
Ya nebî eve te çi bi me kir?
Ev dunya şîrîn bo çi te teh'î kir?**

Di [Kêmkî êvarê de] de, ev heye:

**Ya suwarê rojhilatê, rojavayê
Hûn bidne xatra dotê û dayê
Hûn me xilaskin ji qedayê
Ji belayê, ji xelayê
Ya Şêx Şems Tu h'alê mala xwe bipirs
û me jî vê carê....**

Ji ber va hikariya Erebî di pirtûk û kêmkî *'diraz û dua'* yên Êzdahiyê de û ji ber ku **Şêx Adî** ji Baa'labekê (*Lubnanê*) hatiye **Laleşê**, hinek bi nezanî an ji ber hinde destkeftiyên ramiyarî an diravî bîzava xwe dikin, ku **Êzdiyan** wek nijadek ji nijadên **Ereban** bidin xuyakirinê. Tevî ku di wan pirtûkan de navên ne ereb jî pir in, wek:

[Adem, teyrê Anfer, Şehir kurê Sifr, Tawûs „Şahê xwedayî”, Nesrox, Kamoş, Artiyûs, Şapor, pêxembera bi navê Xasiye, pêxemberê bi navê Yûnan, Ah'ab, Balazûb, Pîrdob, Buxtnasar, Ahşobirş, Igrîkalus...]

Ji aliyekî dî ve, bo çi tê gotin [**Şêx Adî yê Hekarî**] ne [**Badînanî**]? Ma çi têkiliya **Laleşê** bi **Hekariyan** re heye?

Berê her zanayekî û her şêxekî navên nişt û warên, ku di jînê de lê rabûye û rûniştiye, li pey hev bi paş navê xwe dixist. **Şêx Adî** jî di serî de bi **Hekarî** tê navkirin, ne di serî de bi **Baalbekî** an **Samî**. Ez dibînim ku **Şêx Adî** di kok û binyada xwe de ji xelkê **Hekarê** ye, û lew re hemî kêmkî û dirazên **Êzdiyan** jî bi **Kurdî** ne, ne bi **Erebî**. **Hekarî** musulmanên **Sunnî** ne. **Şêx Adî yê Hekarî kurê Musafêr** jî zanayekî musulman bû, ku **Şêyxulîslam Ehmed kurê Teqiyiddîn, Ibin Teymiye yê Herranî** (661-728 hicrî), di pirtûka xwe [**Elwesiye Elkubra**] de, **Şêx Adî** bi **Şêxila'rifin** [*Seydayê Zanayan*] navdike û gelek pesna wî, wek şêxekî ji şêxên xwe dide. **Ibin Teymiye**, ku **Kurd** e û ji xelkê derdora **Urfê** ye, û xudanê bi dehan pirtûk û name ye, li niştê xwe **Kurdistan** û li welatê **Samê** jî

xwendiyê û hinek şêxên wî yên dî yên **Kurd û Erebo** hebûne, lê pesna **Şêx Adî** ji tevan bêtir daye.

Em bên ser cî û warên **Êzdiyan**, emê bi zûkî binasin, ku piraniya navên gund û bajarokên wan bi Kurdî ne, wek van:

[Mûskan, Kendalan, Almeman, Laleş, Gelî Xudêdan, Pîrsik, Isîyan, Eşq Kîbarê, qestelê, Gabarê "Kabare", Xwerazan, Girsvan, Bozan, Bîban, Şêxkan, Serîckan, Xweêavan, Sînan, Şariyan, Girê Pan, Daka Mezin, Xankê, Mem Şivan, Keperto, Dêrebûn, Xêrava, Cinkanana, Bapîran, Kiranî, Xorkan, Ciwanan, Alreş, Mizgeft, Dirêçk, Avşîn, Gelî Sora, Sîran, Kolke, Senger, Tîlav, Kaxêt, Lorî, Tendûrek...û yên dî...]

Di dema bi cihanîna planên Erebkirinê de, li Iraqê û li Sûriyê, ku ji aliyê **Baa'siyên** nijadperest ve hatibûn danan, mijara "**Êzdî Erebo in**" bi xortbûn di nav **Kurdên Êzdî** de hate belavkirinê. Wek niha li **Ermenistanê**, çawa kok û binyada **Kurdên Êzdî** tê qelandin, û li **Azrebeycanê** koka **Kurdên Musilman** tê tunekirin. **Baa'siyan** bo vê yekê pir pere rijandin û gelek şêx kirrîn an xapandin û bi çavtirsandinê ewana ber bi plana **Erebkirina Êzdiyan** ve livandin. Mixabin, ta niha jî hinek mejiyên ne zelal û bi bînahiyek çewt in, vê mijarê davêjin nav gelê me yê **Kurd ê Êzdî**.

Navenda Laleş a çandeyî li Dihokê, sala 2002 hejmara **Kurdên Êzdî** li cîhanê bi nêzîka 175.000 mirov texmîn kiriye, bila em 50.000 mirovin dî jî di ser vê jimarê kin, dîsa jî nagihe ¼ milyonekê. Ev hejmara biçûk jî li van welatan belav e: **Gêyorgiya, Ermîniya, Iran, Iraq, Sûriye, Tûrkiye**, 25 welatên **Ewrûpa** û hinek welatên dî yên cîhanê. Bi hejmarek wilo biçûk û tabelav mirov nikane neteweyekê bîne ser hev.

Gava **Êzdî** neteweyek bi serê xwe bin, bo wan mafê çarenivîsê li gor zagona nêvneteweyî heye. Başê, daxwaza wan a neteweyî çî ye? Avakirina dewletekê ye? Ew dewlet wê li kî derê be? Heger ewana **ne Kurd in**, çawa yekî ji **Gêyorgiya**, an ji **Ermenistanê** an jî ji welatekî dî yê dûr wê biçê **Kurdîstana Kurdan** û bibêje: "**Ev welatê min e, ne yê Kurdan e?**" Ma Kurdên ku bêtir ji 35 milyon mirovin [*35 x 4 caran ji Êzdiyan pirtir in*] û xwîna xwe di ber her bostek axa xwe de dane, wê bihêlin neteweyek biyanî ya biçûk Kurdistanê ji destê wan derxîne?...

Heger rast welatê Êzdiyan, zimanê wan, dêm û babeta serî û qehf û kelexoyê wan, rewştên wan, û bi ser de jî cil û bergên wan, reqş û sema û stranbêjiya wan, navên gund û bajarokên wan, nişt û warê wan ê dayikî, tev kurdî ne, êdî ewana ne **Gêyorgî**, ne **Ermenî**, ne **Azerî**, ne **Alman**, ne **Ereb**, ne **Turk** û ne jî **Fars** in, ewana **Kurd** in, resentiirîn Kurd in, û gava bên pîrskirin: "**Hûn Kurd in an Êzdî ne?**" divê bi asanî û bê dudilî bersîvê wilo bidin: "**Em Kurin û em Êzdî ne.**" Weku em **Kurdên musilman** jî bersîva Ereban didin û dibêjin: "**Em Kurd in û em musilman in.**" û weku Firensî dibêjin: "**Em Firensî ne û em fileh in**", an jî cihowekî alman tevî hemî qirkirinên **Holokost** hîn dibêje: "**Ez Alman im û ez Cihome.**" Eve jî rastî bi xwe ye.

Li dawîya vê gotarê, ez tika dikim, ku em bi hev re, çî **Êzdî**, çî **Fileh**, çî **Ciho** û çî **Musilman**, va kêmkî spîdeyê jî nivêjên **Êzdiyan** bixwînin, ku bo me tevan bi wateyî mezîne:

[Bi navê Yezdanê pak, dilovan û mîhrebî]

Xwedêyo!

Jî bona şanê te,

Jî bona padişahiya te!

Ya Rebbî Tu kerîmî, Tu reh'îmî

Tu Xwedayî, Tu malîkê mulkê cîhanî

Malîkê soq û semayî,

Malîkê E'rşê ezmanî,

Ya Rebbî Tu melîkê Cînn û insî,

Melîkê E'rş û kursî,

Ya Rebbî Tu semed û luft "lutf" û numayî

Ya Rebbî Tu xwedawendî, spehrî,

Xudanê mah û mîhrî

Xudanê çem û nehrî

Ya Rebbî Tu xwedawendî, e'tayî

Ya Rebbî te ne loma

Te ne Imdad e

Te ne awaz e

Te ne reng e,

Te ne deng e,

Te ne çeng e

Ya Rebbî kes nizane Tu kusayî "çawayî"

Ya Rebbî Tu kuherinde yê H'ûtî

Mîndayê "danayê" qûtî

Tu h'elîmî, melekotî

Ya Rebbî Tu h'akîmê şah û gedayî

Ya Rebbî (Tu) her heyî, her heyî, her heyî...

ΩΩΩΩΩΩ